

# LA WG

da Chatrina Josty

## ELEFANTS EN MIA CHOMBRA

Jau n'hai nagin'idea da fisica. Mo ina chaussa m'è restada dad ina da las emprimas lecziuns da fisica che jau hai già en l'emprima secun-dara. I gieva per la pressiun ed il pais. Noss magister ha fatg ina cumparaziun tranter ina maschina da pista che va sur il terren ed ina dunna da 60 kilos che chamina enturn cun chalzers cun tatg aut. Tgi chaschuna dapli pressiun sin il funs? La dunna u la maschina? Tenor las leschas da la fisica è la pressiun che smatga dals chalzers da la dunna sin il funs pli gronda che quella da la maschina da pista. La maschina da pista è bain greva, ma cunquai che la surfatscha dal tatg dals chalzers da la dunna è uschè pitschna, ha ses pais dapli effect. Ditg simpel: La dunna cun ils tatgs auts è sco in elefant che va sur porcellana.

L'exempel è restà u meglier ditg: vegnì endament puspè en mia ultima abitaziun, sin il palantschieu da parchet. En quell'abitaziun stev'jau suletta, ma là avev'jau dapli visitas. Ina saira èn arrivadas in pèr amias e cur ch'ellas han vesì mia collecziun da (paucs) chalzers cun tatg aut han ellas stuì empruvar ils chalzers ed ir dad in chantun a l'auter da mia chombra per sa guardar en il spievel. Cun tatgs auts e fins sur parchet. Crac, crac, crac...

Tge che mes magister da fisica ha propi vulì dir cun ses experiment, m'è daventà cler la damaun suenter la «Modeschau», cur che jau hai contemplà pli precis il palantschieu. Millis da pitschnas forinas en il lain, chaschunads dals 50 fin 60 kilos da mias amias. Irreparabel, hai jau pensà e sco emprim cumprà in tarpun per ch'ins na vesia betg il donn.

Quest donn n'è a la fin betg stà irreparabel, ma el m'ha custà diversas uras da lavur, en schanuglia, cun il fier per far or cun il fier en maun ed in sientamauns da cuschina bletsch. Quest hai jau mess sin il palantschieu e fatg ora cun il fier el. Las forinas s'han serradas, cunquai ch'il lain s'ha extendì cun daventar umid. Fisica?

En mintga cas sai jau uss ch'igl è meglier da zuppar ils chalzers cun tatgs auts, sche amias vegnan a far la visita.

**Chatrina Josty abitescha en ina WG a Turitg e lavura en in biro grond a Cuira. Quest ha displaschavla-main in tarpun cotschen, uschia ch'ella na ristga betg da trair en ses chalzers da color pink per ir a lavur.**